

Litr'iljil Ihlok Gwijùutin 'Àn Nihk'iitik

Geenjìt Eligùu Nànkak Gwizhìt

**TR'IININ DIGIZHEHK'OO HÀH AK'ÀTR'ÀHDAK EENJIT DÀGWIDIIN'E'
NATR'IGWINAA'II GOGWANDAK**

DIIZHEHK'OO GWADATAI' TR'AGWAHTSII

Vàdzaih Zrii' 2010

NITS'OO VÀGWÌDEECH'IN: NDOO TR'EEDAA EENJIT

Adai' gwanoo, tr'iinin tsal kat nits'oots'at ge'tr'oonahatan gwizhit guk'aginilti' ants'at juk gweendoo ginjih leii dhitsii tth'aih jii gwizhit gatr'igiinkhiih. Yeenji' Liard ts'at yeedi' Ulukhaktok gwits'at tthak jii khehlok kat nihkhan gugwidiintth'ak. Yuughwan kat digitr'iinin gootr'oonjik gwehkhe' goots'at tr'igiinjik kwaa gatr'igiinhe'; tr'iinin tsal kat yeedok gootr'inyahchiih gwizrih akoo t'ageedi'in'. Gooyuughwan kat chan kwanchu' gòo agoondaii iizuu hah goo'aii gwat adats'at tr'igiinjih kwaa, gwat juudin goots'at tr'igiinjii loo akoo t'agoonch'uh kwaa.

Tthak ts'at dagwidiinu' t'at li'dagwidlii t'agoonch'uh. Nagwidadhat nihk'iidaankat gwijuutin gwanoo gwinjik leii kat chan khaiinji'gootr'adaadhat chan goonlih. Tr'oochit zrit diitat chan ts'ik niint'aii diitee ndaatth'ak. Aii t'ee zrit gootr'iinin kat yi'eedok gwits'at gootr'oonjik ts'at ge'tr'oonahatan gwizhit goontl'atr'ahchiih, geetak niinzhit gwits'at duuleh laii k'iighe' gwizraih aii gwits'at geedah gootr'inaa'ii geenjit. Kaiik'it gwizhit tr'iinin kwaa goonlii ts'at khagidatree gwizraih goodlit, tr'iinin kat diik'igiinjik gooyuughwan goonlih kwaa, ch'at'agwiiniindhan goovah goonlih kwaa, ts'at gahgeedandai' kwaa. Niinzhuk akoots'ants'at tr'igwiindai'. Nagwidadhat gwiinlit gwizhit akoo tagoodhat gwat tth'aih juk gweendoo ganiinji'gadhat.

Dagwidiinu' t'at aii tr'iinin kat juudin gootr'oonjik t'at dinjii zhuh ts'at enekaii gii kat t'angiinch'u'. Niinzhit dai' gwats'at khaiinji'tr'adaadhat chan goonlii, oonjit k'it tr'agwandaii gootr'ahnuu, residential school gwizhit loo hah khaiinji'tr'ijildhat, nakhwek'yuuu uu'an tr'ahahch'yaa nakhwegahnuu ts'at shih kwaa nagwijaatth'at, zheh nehsriyahch'uu gogwahtsii, gwat tr'iinin kat gok'atr'inahtii kwaa gwik'it diitat nagwidaadhat ts'at nekhwets'at tr'igiinjih kwaa.

Geetak hee tr'iinin kat lat gootr'oonjik ts'at gooyuughwan goots'at tr'igiinjik kwaa gòo goovaniinji'gadhat kwaa. Nagwidadhat 2003 dai' gwanoo, tthak ts'at srii t'agwinaanch'uu 88% gidilii aii tr'iinjoo kat chan li' hah khaiinji'goojildhat gwat 73% kat chan zhehk'oo zhìt akoo t'agwidich'uu gwik'it gwiinli'. 38% kat tat chan aii tr'iinjoo nich'it nilii dai' khaiinji'tr'ijildhat gwehkhe' dinjii kat tat chan 23% akoots'ants'at gwik'it akoo t'angiinch'u'. Geetak hee 41% tat chan aii dinjii digiyuughwan nilih ji' chan khaiinji'tr'ijildhat chan ginuh. Gwiinchii zrit kwanchu' gòo ts'eet'at iizuu akoo diinch'ii hah tr'oo'aii chan gwinuh.

Gwat aii gwandak ndoo gwinyaa'aih kwaa. Akoo t'aginuut'at aii Tr'iinin ts'at Zhehk'oo Ak'atr'ahndak Dagwidiin'e' geenjit dagwidiin'e' gwintl'atr'ahchuh gòo nits'oots'at gwitr'it gwizhit ejuk natr'agwahtsii chan giiniindhan. Gwiinlet gwizhit jidii gi'gwadhan gwat gah gwitr'it t'agugwah'in kwaa. Gwat geetak noogoonuh chan goonlii; khehlok nilii kat gootr'iinin

kat gok'atr'ahnahtyaa chan giiniindhan; nits'oots'at aii Department of Social Services kat hah nihkhah gwitr'it t'agogwahah'yaa chan giiniindhan gogwidiintth'ak. Aii geenjit zhik gwats'at jidii ejee natr'igwihee'aa chan nakhwets'an aatsii. Gwat guugaa zrit, aii Committee kat chan goolat kat chan ejuk natr'agwahtsii gwik'it goovah goonlih. Aii Department gwichit ihlee diiyah nidhizhii ts'at jidii tthak gatr'igiinhe' chan goojiitth'ak geenjit shoh iidali'.

Jidii tthak gatr'igiinhe' loo shoh goots'an altsaii ants'at dagwiheech'yaa gwadatai' tr'agwahahtsaa kheenjit akoo t'agiheedi'yaa geenjit shoh giinlih.

Gwiinlet chan gwandak nizrii diits'an altsaii, gwat jii edineht'eh gwizhit gwiinlet gwizhit gwatanoh'yaa t'agoonch'uh. Jii gwakak loo jidii tthak t'agwiheech'yaa gwik'it gwiheelyaa:

- 1) Gwich'i' gòo gwichih tr'igitohkkyah geenjit giiniindhan, zhehk'oo nihkhah t'agiheech'yaa ts'at natr'ahaazhii eenjit; nakhwakaiik'it gwatat Healthy Families Program gwiheelyaa geenjit gwitr'it gohtsii;
- 2) Jidii gwiyaan' gwiinchii hah goo'ain gwinjik gwitr'it t'agogwah'ii, gwat gahaljii dai' goots'at tr'iinjik geenjit diinjigidizhit.
- 3) Kaiik'it gwitak gwinyaanch'uu gwizhit Child and Family Services Committees gwilain gwiheedhaa geenjit diinjigidizhit, aii dagwidiin'e' gwizhit gatr'agwaandak; aii gah tr'iinin kat tthak nits'oots'at adats'at tr'igiinjii geenjit gagoo'ain;
- 4) Kwanchu' ts'at agoondain iizuu hah goots'at tr'igiinjii eenjit, kaiik'it tthak geenjit gogoodahkat geenjit gi'gwadhan gwiheelyaa;
- 5) K'eejit kat juu googhain 16-19 gidilii tthak ts'at goots'at chan, nijin gwizhit juudin adats'at tr'iinjii niindhan kat googhain 23 gwits'at tthak gooveenjit gwiheelyaa;
- 6) Nits'oots'at aii Child and Family Services goo'ain ejuk gogwahtsii geenjit chan, nijin gwizhit tr'iinin goontl'atr'ahchih geenjit goo'ain, tr'iinin tsal gootr'oonjii adai' gwanoo gwik'it, ts'at kaiik'it gwizhit adats'at tr'igiinjii geenjit zhan gaviidili';
- 7) Datsan gwich'i' eenjit Gwitr'it Gogwahtsii geenjit gwitr'it chan giiniindhan nijin gwizhit aii Health and Social Services kat chan goots'at tr'igiinjii; Education, Culture and Employment; Justice; gehkhee ts'at NWT Housing Corporation kat zrit igidint'eh goots'at tr'igiinjii geenjit gwitr'it t'agwichidhaa'ii geenjit diinjigidizhit tseedhoh hah tr'iinin kat goots'at tr'igiinjii, atr'oodahkat gwizhit dagwidiin'e' ahdandain gooheekat ji' gòo duuleh zeh chan giiniindhan;
- 8) Department of Health and Social Services gwizhit gwitr'it gogwahtsii geenjit diinjigidizhit, jii gwandak gwizhit gwiheelyaa ji' gadiinjigidizhit, duuleh drin 120 gwinjik gatr'igwihee'ah ji' geenjit.

Gwich'i' ts'at tr'oochit gogwijiitth'ak dai' nihkhan goovaniinji'gadhat kwaa gwik'it gwiinli' gwat nahgwan gwanoo gwalat chan ejuk natr'agwiniindhat. Jii Healthy Families Program zrit zhehk'oo adats'at tr'igiinjii geenjit gwik'it goo'aii, tr'iinjoo tr'iinin k'oo t'iinch'uu dai' kat chants'at gootr'iinin vaghah ihlogwinli' gwits'at gidilii. Aii khehlok zrit goozheh ts'at nihdaginiinjil goots'at tr'igiinjii geenjit, gwiinzii diik'agijii geenjit goots'at tr'igiinjii, gah tr'iinin ts'at dagahanh hah nihkhatr'ahahchyaaw gwik'it gogwahtsii. Juhts'ants'at zrit aii gwik'it geenjit gwitr'it gogwahtsii chan gwiiniindhan. Gwat guugaa zrit kaiik'it daankat gwizhit jii tthak gwik'it gogwahtsii. Jidii hah gwitr'it t'agogwah'ii chan goonlii kwaa gwat tthak geenjit goo'aih kwaa k'it zhan goonlih.

Teet'it Zheh gwizraih chan jii Child and Family Services Committee geedi'in', gwehkhe' nagwidadhat 1998 dai' dagwidiin'e' gwizhit gooveenjit srinatr'agwiniinlii. Juhts'ants'at tthak ts'at gwiinzrii gwitr'it gogwahtsii geenjit gwiiniindhan, juudin kat aii gwizhit gahgeedandai', aii gah juudin gwit'agwiin'eh goovah goonlih ji' goots'at tr'igiinjii. Akoots'at goodaazhii kat goots'at tr'igiinjii geenjit gogoohadahkat; geetak hee chan goo'anjoo kat chan goots'at tr'igiinjii natr'agwahahtsaa. Aii geenjit tth'aih chan tseedhoh geenjit gogoohadahkat ts'at gwiinchii chan giiniindhan.

Juudin kat chan gwit'agwiin'eh gagoo'aih chan juk gwah gwitr'it gogwahtsii, akoots'at gootr'oonjik dai' iinch'its'at gwah gwitr'it t'agogwah'ii geenjit giiniindhan. Nihkhan akoo t'aginuuz zrit, gootr'oonjik gwadatai' tr'agwahtsii, aii tr'iinin kat gookaiik'it ts'at goodaazhii kat ch'i' gootr'oonjik. Tr'iinin leii zrit 600 ants'at giinlii zrit loo hah gootr'oonjik gwadatai' gwik'it goo'aih. Canada gwizhit iisrits'at diyeenjit gwiizuu gwik'it goo'aii giik'agaanjik. Juk nits'oo nakhwah goo'aii ejee natr'agwihee'aa geenjit diinjigidizhit. Li' hah gwizhit gwinoh'ih ji' chan duuleh gwiyaan loo gwiniint'aii gwik'it goonlii gadiinjigidijii, gwat aii tr'iinin kat gookaiik'it gwizhit t'agiheech'yaa chan gwiiniindhan.

Ndoonihlik zrit, tr'iinin kat gooyuughwan kat chan kwanchu' ts'at tseedhoh iizuu akoo diinch'ii hah goo'aii aii geh'an akoo t'angiinch'uu. Tr'iinin gootr'oonjik t'ee aii yuughwan kat chan natr'ahaazhii geenjit gwah t'agwiheech'yaa chan gwiiniindhan. Geetak chan goovah gwiizuu gwik'it gwahtsii. Geetak chan niinzhit gwits'at geedaa gwichih niinzhit chan nagogoodhah'ii – t'ee k'anagahdadał chan nits'oots'at adats'at tr'igiinjii chan gwiinleii kwaa. Aii gah chan, kaiik'it gwiinchii gòo gwatsal gwatat loo nihk'it t'agidich'uh kwaa. Jii tthak ejuk natr'agwahtsii geenjit gwiiniindhan.

Gahgwidandaii t'at k'eejit kat chan nits'oots'at adagogwadaandaii chan gogoonrii gwah goonlih. K'eejit kat juudin googhah 16 ts'at 19 gwits'at tthak loo gwah dagwidiin'e' gwiinzii goonlih kwaa – gwalat chan goonehch'i' k'it t'idi'ii. Tr'oochit chan 1977 dai' gat'igiinhe' gwat tth'aih juk gwik'it goo'aih. Aii geh'an zrit, aii Child and Family Services gwichit zrit tthak ts'at nihk'it t'agwiheech'yaa geenjit gwizhit natr'iheelyaa gwiiniindhan, gwat tth'aih, juudin gook'atr'inahtii chan googhah 23 gwits'at giheedilyaa.

Tr'iinin ts'at zhehk'oo kat hah ECE, Justice ts'at NWT Housing Corporation kat goonagoo'ee chan gwiizuu goonlih. Duuleh jii dagwidiin'e' hah ejee natr'agwahtsih ji' chan gwiheezaa. Jidii tseedhoh goots'an tr'ahtsii chan tr'iinin kat gweenjit goo'aih gwizrih; juudin atr'oodahkat gwits'at heehaa kat chan goodavee gwiizii gogwahtsii juudin dagwidiin'e' ahdandaii goots'an tr'ahtsii; goo k'anagahdadał t'ee zheh nizrii gwizhit t'agiheech'yaa geenjit gwiiniindhan. Leii kat chan public housing gwizhit t'angiinch'uu, aii kat hah gwit'agwiin'eh goonlii gwat nits'oots'at goots'at tr'iniidinjii geenjit sratr'igwihee'aa geenjit gwiiniindhan. Gwiinlet gwizhit gwat'agwiin'eh goonlii tr'igwidiintth'ak, aii tthak sratr'igwihee'aa gadiinjigidijii.

Jidii gwijiiditth'ak t'at gwit'agwiin'eh goonlih ji' chan niinzhuk chan gwizhit gwiinli', gwat gwiizii gah goo'aih kwaa. Tr'oochit nagwidadhat 2000 dai' aii Child Welfare League of Canada jii gwizhit natr'igwinah'in dai' chan tth'aih gagoo'arii; gwiinlet goots'at tr'igiinjii gwik'it goonlih kwaa, gwichih goo gwich'i' gah chan, tr'iinin gootr'oonjik t'ee chan aii yuughwan kat goovaniinji'gadhat kwah, leii kat chan gwitr'it gwiinchii goovah goonlii; giik'agaanjii ts'at aii gwitr'it goots'an tr'ahtsii chan gwit'agwiin'eh goonlii; dinjii zhuh nilii kat gwah gwitr'it'agogwah'ii kwaa, gwichit tat chan.

Gwiinzii gwitr'it t'agogwah'in kwah ji' laanch'ii hah jidii eenjit giniidikhii t'at gwiyya'an gwiizuu vagwideech'in'. Nits'oots'at aii tr'iinin kat chan goodavee gwiheezaa geenjit gwitr'it gwiinchii gooveenjit gogwahtsii giik'atr'aanjik. Jii khełok kat chan nakhwedavee gwiheezaa geenjit diinjigidijii. Jidii tsal goonlii guugaa zrit goolat kat gwizraih gwiinzii vagwideech'in gwik'it gogwahtsaih.

Jidii geenjit giniidikhii t'at duuleh nahgwan chan gukagwihee'aa gwik'it gogwahtsii chan gwiiniindhan. Jii tthak loo juk iinch'ii chan gwiiniindhan. Jidii gwiinchii gagoo'arii t'at tseedhoh gwizhit natr'igwihee'aa ji' chan gwiiniindhan. Tr'iinin kat loo juk iinch'ii goodavee gwiheezaa geenjit juk kxanh akoo t'agwiheedi'yaa ji' geenjit goonlih gwizraih. Aii tr'iinin kat chan goodavee gwiinzii goonlih ji' chan gwiyya'an chan gwiheezah gwizrih. Gwicht iidalii geenjit loo dajiidinu gwiiniint'arii gwik'it gwiheelyaa gahgwidandaih. Jii tthak loo gwiiniindhan ts'at gat'agoolii geenjit diinjigidijii.

Juudin kat nakhwets'at tr'igiinjik kat tthak ts'at hain' nakhwaadinuh. Nijin gwa'an nihkhah ładhaajil gwits'at nadhoojil geenjit hain' chan nakhwaadinuh., juudin kat chan jidii tthak gagwaandak, goo juudin kat nakhwets'at gwidinuut'oo, diiyah gwitr'it t'agogwah'in kat chan, gwat datthak nakhwegwitr'it gi'gwadhan gwik'it gwahtsaii chan. Nakhweh'an juhts'ants'at chan jidii tthak geenjit ginohkhii aii gwik'it akoo t'agwiheedi'yaa geenjit gwiiniindhan nekhwezhehk'oo ts'at digitr'iinin kat gweenjit niinji'idadhat. Dinjii kat NWT gwizhit duuyeh gwit'it goonlii goots'an gwaatsih kwaa ts'at jidii tthak goodavee gwiheezaa geenjit gwitr'it t'agwaa'ii.

Mahsi' choo,

Tom Beaulieu, Chairman, Standing Committee on Social Programs, MLA, Tu Nedhe

Glen Abernethy, Deputy Chairman, MLA Great Slave

Wendy Bisaro, MLA, Frame Lake

Bob Bromley, MLA, Weledeh

David Krutko, MLA, Mackenzie Delta

JIDII TTHAK LOO GWIINIINDHAN

*CHILD AND FAMILY SERVICES OPERATIONAL STRATEGY GWIZHIT DIIZHEHK'OO
GUK'ATR'AHNAHTYAA TS'AT TR'IINJII GWIYAA'AN IISRITS'AT GWIHEELYAA
TR'AGWAHTSII*

Gahookhwindaih geenjit:

Nits'oots'at aii tr'iinin kat NWT gwizhit gwiinzii guk'atr'inahtii kwaa t'at iisrits'at diiyeenjit goonlih. Juk iinch'ii zrit nits'oots'at tr'iinin kat juudin gootr'oonjik t'at gwiinzii gooveenjit goonlih kwaa; juk ejuk tr'agwahtsih kwaa ji' t'at gwiyya'an gwiheezuu gwik'it gwiheelyaa gwik'yinjidiijii.

Tr'iinin kat nits'oots'at kheenjit niinji'gadhat loo gwiinzii goonlih kwaa, shik yee'ok tr'igwinah'ii. Juhts'ants'at guk'anootii t'at gwit'ee zrit goodavee gwiheezuu gwik'it gwiheelyaa gahgwidandaii – geetak shik gwik'it t'angiinch'uh. Geetak hee t'at nits'oots'at guk'anootii t'at shik gwik'it t'agiheech'yaa chan giik'atr'aanjik. Aii t'ee igidint'eh loo gwik'it guk'atr'ahnahtyaa t'agoonch'uu, loo gwiint'oh gwadaat'oo goonlih. Jidii tthak gwinaa'ih ji' t'at gwiyya'an loo nits'oots'at guk'atr'inahtii t'at jidii tthak eenjit gwiyya'an gwiizuu vagwideech'in chan gahgwidandaih ants'at gwiyeendoo loo t'ehshit gwadaat'oo li' hah goonlih. Guugaa zrit, nits'oo aii tr'iinin kat ts'at digiyuughwan kat kheenjit niinji'gadhat t'at t'ehshit iizuu goo'aii chan giik'atr'aanjik. Aii geenjit, nits'oots'at gwizhit chan ejuk tr'agwahtsih ji' chan gwiinchii diiyah gwihee'aa chan gahgwidandaih.

Jii Child and Family Services Act giyahnuu gwizhit jidii gwidinithat'oo t'at aii Director nilii gwizraih jidii gwidinithat'oo k'iighe' adanh zraih ejuk gwahtsii geenjit gadhan nilii. Nits'oots'at guk'atr'ahnahtyaa geenjit gwiinchii goonlii gwat gwiinzii vagwideech'in kwaa goo jidii hah goo'aii chan gwiinlet elit kwaa. Nijin gwizhit tseedhoh naginiinlii t'at vakwaa tr'agwahtsii gwik'it goo'aih. Nits'oo vagwideech'in t'at juk gweendoo geenjit gwiinzii kwaa.

Kwanchu' ts'at ts'et'at iizuu hah goo'aii guuzhik tr'iinin kat goovaniinji'gadhat kwaa goo khaiinji'tr'ijildhat, aii geh'an Social Service gootee nidhijil gahgwidandaih. Yuughwan kat chan shih goonlii kwaa goo adats'at tr'igiinjii kwaa gwik'it goovah goonlih gòo digiyinji' khaiinji'gootr'ijildhat. Aii gwik'iighe' t'at nits'oots'at K'adagwidaadhat gwah goonlih ji' t'at gwadatai' gwitr'it gogwahtsii gadiinjigidijii. Nits'oots'at aii k'adagwidaadhat gwitr'it gogwahtsii t'at gwiyya'an loo gwiinzii gwizhit gogwahnah'yaa ji' geenjit diinjigidijii.

Tr'iinin tsal kat chan iisrits'at goonlih ji', guugaa zrit Child and Family Services t'at tr'oochit gwiinchii gagoo'aih. Ładhaajil dai' kaiik'it gwitak gwinyaanch'uu gwizhit danh leii kat chan juudin yuughwan kat iisrits'at yuughwan k'eejit nilii kat, ginjih hah goots'at tr'igiinjii t'at gwiyya'an srits'at nilii akoots'at goots'at tr'igiinjii chan nilii. Tr'iinjoo tr'iinin k'oo t'iinch'uu goo gwichih gahgiheedandaii geenjit giik'atr'ahaandal chan gwiiniindhan, nits'oots'at yuughwan goodlit ji' t'agwiheech'yaa geenjit zhan heelyaa, respite care goo tr'iinin k'atr'inahtii

geenjit, digizheh gwizhit ts'at tr'iinjii akoots'at nihkhan gwah gwitr'it t'agwaa'ii geenjit programs gwiiniindhan. Gwichih akoo t'agwidi'ih ji' t'at yeendoo ji' loo gwiheezaa gahgwidandaih.

Gwich'i' Guk'atr'inahtii eenjit Gwitr'it ts'at Tr'iinjii Tthak

1. Nits'oo dagwidiin'e' goonlii chan juhts'ants'at ejuk gohtsii:
 - a. gwich'i' ts'at gwichih gwah gwitr'it t'agoh'ii; nits'oots'at akoo t'okhwe'ii t'at gagoondak;
 - b. nits'oots'at diizhehk'oo kat akoo t'okhwe'ii geenjit gwah goondak, gwitr'it gohtsii goo nits'oo ejuk tr'agwahtsii geenjit chan;
 - c. kaiik'it gwizhit jidii tthak hah giik'atr'ahndak aii Director gwizhit gwitr'it t'agwah'ii ts'at gwintl'atr'iinlih;
 - d. akoots'at duuleh dagakaiik'it gwizhit gwats'at tr'iinjii geenjit gagoondak gwat, akwah ji' tl'ee regional, goo territorial goovaniinji'ohthat nijin jidii khaiinji'gootr'ijildhat hah goo' aii gah gwitr'it t'agogwahah'yaa geenjit;
 - e. geetak hee kwanchu' goo ts'et'at iizuu hah goo' aii kwaa dahshuk natr'ahahzhii eenjit nagogoodhah'ii geenjit goots'at tr'igiinjii geenjit gwiiniindhan, jidii gwinjik nihkhah gwitr'it t'agoh'in zhit niinji'oodhat.
2. Nits'oots'at adats'at tr'igiinjii geenjit jidii vinjik gwitr'it aii gah guk'agogwiheendaih.
3. Khehlok K'adagwidaadhat gwizhit gwah gwitr'it t'agogwah'ii giiniindhan, Education, Culture and Employment, NWT Housing Corporation, Justice, Health and Social Services, Vidree'oonatsoo kat jidii tthak hah gwah goo' aii srinatr'igwihee'aa geenjit diinjigidijii.
4. Diikaiik'it gwizhit tthak loo tseedhoh gwintl'atr'ahahchyaa geenjit gwadatai' gwik'it gohtsii, akoots'at 2001-12 tseedhoh gatr'igiheekhyah Legislative Assembly gwizhit goots'an ohtsii.
5. Diikaiik'it gwizhit jidii khehlok goonlii gwatat chan t'aih goots'an ohtsii goo gwah gwitr'it t'agogwah'ii geenjit guk'andehnohtii.
6. Aii Healthy Families Program diikaiik'it gwitak gwinyaanch'uu gwizhit natr'ahahchyaa geenjit guk'andehnohtii, tthak ts'at gwiinchii gagoo' aii eenjit.

7. Khanh ts'at giiniindhan ji' aii Director tseedhoh hah goots'at tr'iinjii geenjit gadhan heelyaa gadiinjigidijii.
8. Juudin adats'at tr'iinjii niindhan kat ts'at t'aih goots'an ohtsii.
9. Gootr'oonjii gwichih policy gwik'it ohtsii goo duuleh aii Łagwiinaadhan Nits'oots'at Gwik'anahtii geenjit gogoodahkat gwats'an ohtsii.
10. Digizheh gwizhit goots'at tr'iinjii goo guk'atr'ahndak geenjit gwats'an ohtsii nijin aii tr'iinin kat sriigogwandaii geenjit.
11. Tthak giik'agahaandal geenjit gwats'an ohtsii akoots'at kaiik'it gwizhit yuughwan eenjit giik'agaanjii eenjit gwintl'atr'ahahchyya.
12. Diizhehk'oo hah gogoontrih danh nits'oots'at goots'an tr'iinjii geenjit gwitr'it gohtsii, gehkhee ts'at juudin beebii goo tr'iinin tsal kat hah gwiinchii gagoo'yii gwik'it gohtsii (yii geh'an łanch'ii hah goodhaii gwah goonlih).
13. Nakhwinagoo'ee gwa'an tthak łoo kwanchu' gòo ts'ee't'at iizuu eenjit nits'oots'at adats'at tr'igiinjii geenjit resources gweenjit gohtsii, gehkhee ts'at gwaa'an tthak jidii hah gwitr'it gogwahtsii, goots'at tr'iinjii geenjit diinjigidijii.
14. Nijin gwa'an khaiinji'tr'ijildhat gwizhit tthak policy gwiinchii geenjit gohtsii, jii tthak hah:
 - a. Nijin gwa'an digitr'iinin kat guk'atr'inahtii geenjit gwitr'it gohtsii;
 - b. Juudin tehk'oo ts'at t'eedi'in aii kat ts'at tr'igiinjii gadiinjigidijii;
 - c. Nijin gwizhit khaiinji'tr'idaadhat gwik'it goo'yii, gehłee geedaa ihłeh geenjit zehh gweenjit gohtsii gadiinjigidijii.
15. Nakhwakaiik'it gwitak gwinaanch'uu gwizhit gwitr'it gogwahtsii geenjit tseedhoh goontl'atr'ahchuh geenjit jii tthak gwik'it: zehh ihłeh gweenjit, shih gwintl'atr'aakaii, ginjih hah goots'at tr'igiinjii, treatment programs, natr'ahaazhii kaiik'it gwahtsii, yee'ok nankak programs akoo diinch'ii gweenjit gohtsii, etc.

TR'IININ DIIZHEHK'OO HAH GWATS'AT TR'IINJII GEENJIT JIDII GWIYAA'AN ELIT IIZUU GOO GWEENJIT GWIHEEZAA GWIK'IT GWINJIK GWITR'IT GOHTSII

Nits'oo vagwideech'in:

Residential School tth'aih ginjih leii dhitsii hah, gwat nakhwetr'iinin kat nits'oots'at guk'atr'inilti' loo gwiizuu vagwideech'in geenjit, tth'aih juk gweendoo ganatr'aandaih. Goot'aiinji'gidaach'uh kwaa gwik'it goo'arii, jidii vinjik k'atr'agwaadhat, gwat juudin Health and Social Service gwizhit nilii kat chan gwah goonlih.

Jii natr'igwinaa'ii dai' t'at leii kat akoo t'aginnu t'at tr'iinin kat diizhehk'oo haa tthak chan gwiizuu gwah gwahtsii gwik'it gwiinli', juudin eenjit gwah t'angiinch'uu zhan gidilih. Geetak hee aii tr'iinin kat goo digizhehk'oo hah gwiinzii gwah nagwijaanaih kwah ji' chan juudin goots'at tr'iinjii nits'oots'at gwiinzii gogwahtsii geenjit diinjigidizhit chan gogoontrii aii khehlok natr'igwinaa'ii gwaatsii kat chan gogwidiintth'ak.

Nits'oots'at tr'iinin kat gootr'oonjik kwaa geenjit ginjih giik'agaanjik t'at – ants'at juudin loo hah gootr'oonjii geenjit gwik'it gogwahtsii ji' geenjit – nits'oots'at nihts'at tr'igiinjii geenjit gogwahtsii goo khainji'gidijii li' hah gwah goonlih ji', aii gwizhit goots'at tr'igiinjii geenjit diinjigidijii.

Duuleh goots'at tr'iniidinjii ji' t'at diiyah gwitr'it t'agogwahah'yaa geenjit gwiiniindhan, nits'oo gwiyya'an gogoontrii kwaa gwinjik gwitr'it t'agwaa'ii; yuughwan kat goodagwidiin'e' guk'atr'ahnahtyaa goo diiyah gwitr'it t'agogwah'ih ji' chan gwiheezaa; akoots'at khehlok gwichi'in kat diiyah chan gwitr'it t'agogwahah'yaa chan gwiiniindhan tthak gwiheezaa geenjit.

Jidii Gwiyya'an Goodhaini Goonlih Kwaa

16. Dagwidiin'e' zhit ejuk gogwahtsii jii gwits'at:

- a. Canadian Charter of Rights and Freedoms dagwidiin'e' ts'at Dinjii Zhuh eenjit Rights aii Dagwidiin'e' gatr'igiinkhii gwits'at gwiheelyah ji' gadiinjiidijii;
- b. jidii gwiyya'an goodhaini goonlih kwaa gwakak natr'iniinli' ji' gadiinjiidijii, guk'atr'ahnahtyaa chan, gootat natr'iheedaa chan, gwat nihtats'at gogwihee'aa chan;
- c. diizhehk'oo haa tthak goovah gwitr'it t'agogwah'ii geenjit duuleh gwizhit natr'iheelyah chan gwiiniindhan;
- d. diizhehk'oo nihkhah t'agiheech'yaa gwizhit natr'iheelyah chants'at gootr'iinin kat juudin gwah t'angiinch'uh kwaa nihkhah gootr'inyahchih gwiiniindhan;
- e. juudin khehlok early intervention hah goo'arii kat gwah gwitr'it t'agogwahah'yaa geenjit gwiiniindhan jidii gwizhit tagoodhat

gahgiheedandaii geenjit, akoo ts'at gwiheezaa geenjit gwitr'it gogwahtsii. Jii kat gwakak t'agiheech'yaa chan gwiiniindhan:

- i. tr'iinin guk'anahtii nilii,
- ii. vizhehk'oo kat gòo vadaazhii kat chan,
- iii. jidii Band gwats'at t'iinch'uu ihlee aii gweenjit nadhat, ts'at,
- iv. juudin loo hah vahdandaii nilii, professional nilii giyahnuh.

17. Aii ginjih gootr'oonjik t'at ejuk gogwahtsii chan giiniindhan, jii hah:

- a. tr'iinin gootr'oonjii gwichih dizhehk'oo nits'oots'at tseedhoh hah goots'at tr'iinjih ji' t'at duuleh ejuk gogwahtsii gwik'it gwiheelyaa;
- b. aii juudin gwats'at tr'iinjii gwichih goots'at tr'iinjik eenjit gwiinzii gah goo'aih kwaa gwik'it gogwideech'in.

18. NWT gwizhit nits'oots'at nekhwek'yuuh gah policy gogwahtsii geenjit diinjigidijii, nits'oo gwiidandaii eenjit, gòo digidaazhii kat ganiinji'gadhat ji' goo aii dagakaiik'it goots'at ginohkhih goo gageedandai'.

Nihkhah Gootr'iniinlii Eenjit

19. Nits'oots'at aii dagwidiin'e' goo'arii gwalat ejuk gogwahtsii, nihkhah gootr'iniinlii gwizhit natr'inyahchih, gwah gigiinkhii geenjit, gwat'agwiin'eh ejuk gogwahtsii chan, gwichih gatr'igiinkhii, ts'at guk'atr'inahtii gwinjik.

20. Nits'oots'at guk'atr'inahtii chan policy gehkhee ts'at standards gwizhit natr'iniinlii, gwat'agwiin'eh ejuk gogwahtsii chan, gwah gwitr'it t'agogwah'ii chan, goo jidii nihts'at tr'igiinkhii t'at gi'gwadhan gwiheelyaa geenjit.

21. Tr'iinin gok'atr'inahtii geenjit digiyuughwan ts'at dizhehk'oo hah gahgiheedandaii geenjit gwik'it gohtsii.

22. Nits'oots'at aii dagwidiin'e' gwizhit tthak gahgiheedandaii gòo gwiinzii gwik'iighe' gwik'itadziitr'ah'ee geenjit ginjih tagohnjii geenjit diinjigidizhit.

23. Health and Social Services kat guk'iighe' jidii conflict resolution policy gitr'ahnuu gogwahtsii chan giiniindhan, nits'oots'at inihlik gwa'an loo juudin gwichit hah goo'arii chan gwah gwitr'it gogwahtsii gwat'agwahdahch'yaa gwik'it gooli'.

24. Aii dispute resolution k'iighe' duuleh tr'iinin tsal digiyuughwan goo dagadaazhii kat ts'at gwit'ii natr'agwahtsii.

Advocacy and legal process

25. Dagwidiin'e' gwalat ejuk gogwahtsii:
- a. Section 85(1) ts'at aii Section 85(2) ejuk gohtsii, nijin gwa'an nihkhah tr'igiinkhii tr'iinin digiyuughwan kat hah gootat advocates chan gwah t'agiinch'uu giiniindhan, gehkhee ts'at juudin gwah gwitr'it t'agogwah'ii, atr'oodahkat gogwahtsii, goo jidii tthak geenjit. Advocate gwinuh ji' t'at jii kat duuleh t'agiinch'uu:
 - i. dagwidiin'e' ahdandaii nilii goo vik'it nilii;
 - ii. vadaazhii nilii gòo valak ihlee;
 - iii. juudin veenjit Band gwizhit gwitr'it t'agogwah'ii goo viyuughwan vats'aii nadhat;
 - iv. jidii khehlok hah dagakaiik'it danh gwizhit gwitr'it t'agogwah'ii; goo
 - v. ihlee juudin aii tr'iinin loo hah niinji'adhat chan.
 - b. aii tr'iinin dinjii zhuh nilii ts'at Band gwats'an nilii, aii geenjit Band Council ts'at gwah goondak geenjit chan, nijin danh gootr'oonjik danh goo goot'adhahch'yaa danh chan;
 - c. Giiniindhan ji, aii jidii affidavit gitr'ahnuu t'at, digiyuughwan ahaa' ginuh ji' t'at Band Council ts'at goontl'aochuh.
 - d. Aii tr'iinin digiyuughwan kat hah dagwidiin'e' geenjit gogoodahkat geenjit gwadatai' gohtsii inihlik gwa'an geenjit;
 - e. Atr'oodahkat gwits'ee heedah ji' eenjit aii Director vidinehtl'ee gogwahnah'yaa geenjit gi'tr'idineechyaa chan giiniindhan;
 - f. Section 8(4) ejuk gogwahtsii chan giiniindhan, juudin kat chan gogwandak veets'it chan ginuu, nits'oots'at gwit'ii ejee natr'agwahahtsaa geenjit.
26. Tr'iinin gwideezhuu gehdeeth'ak geenjit jidii chan ejuk gohtsii, gwat jidii tthak veenjit akoo t'igidi'ii loo gwik'itaziihah'ee geenjit diinjigizhit.
27. Aii t'at Child and Family Services committee tthak ts'at gagootr'oohanahchyaa human rights, tr'iinin guk'atr'ahnahtyaa ts'at advocacy eenjit.
28. Nijin gwizhit giik'atr'aanjii eenjit aii Band gwizhit chan gwitr'it t'agogwah'ii kat diiyah gwitr'it gogwahtsii chan giiniindhan.

29. Department of Justice chan igidint'eh diiyah gwitr'it t'agogwahah'yaa chan giiniindhan, juu t'agoonch'uu ts'at:
- a. tr'oochit ganatr'igwinii'aih danh gwats'at aii dagwidiin'e' ahdandaii giiyah gwitr'it t'agogwah'ii geenjit diinjigidizhit;
 - b. jidii gwadàl hah goots'at tr'igiinjii hah goots'an tr'ahtsii chan giiniindhan; akoo,
 - c. dāhshuk chan dagwidiin'e' ahdandaii clients gwah gwitr'it t'agogwah'ii geenjit ejuk tr'agwahtsii chan diinjigidizhit.
30. Dagwidiin'e' ahdandaii hah, atr'oodahkat chan, Department of Justice tthak hah juhts'ants'at gwitr'it chan giiniindhan;
- a. dispute resolutions gehkhee ts'at nihkhah gootr'iniinlii geenjit nijin atr'oodahkat goonlih ji' aii tthak gwizhit; gehkhee ts'at,
 - b. nijin gwizhit tr'iinin kat eenjit ginjih leii dhitsii danh gahgiheedandaii geenjit ginjih tr'ahtsih ji' gadiinjigidizhit.

Khehlok kat diiyah gwitr'it gohtsii

31. Nijin chan aii tr'iinin kat goo dizhehk'oo eenjit t'at client service eenjit gwitr'it gohtsii gehkhee ts'at policy and procedure giik'atr'aanjii chan tthak geenjit gwiiniindhan.
32. Tr'iinin Dizhehk'oo eenjit Services goo'arii eenjit gwadatai' gohtsii chan gwiiniindhan, leii kat anihlik gwa'an dinjii tthak geenjit.
33. Aii dagwidiin'e' ejuk gwehdineetl'oo chan giiniindhan, jidii ginjih gwik'itadziigahah'yaa geenjit.
34. Jidii gwidinithatl'oo chan ejuk gwehdineetl'oo chan giiniindhan; gehkhee ts'at gwehnee'aa gwi'dinehtl'ee, nits'oots'at gwi'dinehtl'ee, website, dinehtl'eh tsal yuughwan kat eenjit, zhehk'oo eenjit chants'at tr'iinin kat nijin child protection system eenjit.
35. Juudin gwi'dinehtl'ee gogwinah'ii eenjit gadhan nilii geenjit policy and guideline gohtsii chan gwinuh.

Nits'oo vagwideech'in geenjit:

Łaanch'ii hah natr'igwinah'ii dai' łoo gwiinlet gwizhit gogwahnah'yaa geenjit chan, gwikhehkai' kat chan gwiinchii gwizhit gogwahnah'yaa geenjit, juudin gwitr'it gwats'an ahtsii chan, guk'agwataadhat chan, guk'andehnahtii chan, ginjih goots'an tr'ahtsii chan, technical support chan, policy tr'ahtsii chan. Jidii k'eejit nilii tthak chan giiniindhan.

Nijin juk gweendoo vagwideech'in chan gwadatai' vah gwiilii, aii geenjit chan juudin gwizhit gwitr'it t'agogwah'ii chan ejuk gogwahtsii giiniindhan, nits'oo guk'agwataadhat chan gwat gwizhit policies and procedures gwadatai' gohtsii.

Jidii iisrits'at nilii t'at nits'oots'at tr'iinin kat khaiinji'gootr'adaadhat kwaa geenjit diinjigidizhit. Nits'oo chan gwiyya'an gwiinzii gwizhit gwitr'it gogwahtsaih kwaa. Aii geenjit gwalat chan ejuk gogwahtsii chan giiniindhan, nits'oots'at goots'at tr'igiinjii goo giik'agahaandal geenjit diinjigidijii.

Eju' łoo tr'iinin tsal kat chan gwiinzii goots'at tr'igiinjii kwaa chan giik'agaanjik, shih ehdanh, zeh ehdanh, goondaa nihligadhakhaii, teh'oo t'igidi'ii chan. Jii tthak gogwahnah'yaa chan giiniindhan łoo human rights gwats'an tr'ahtsii kwaa k'it akoo t'agwiinch'uh.

Nakhwakaiik'it gwatak gwinyaanch'uu gwizhit aii intervention goo support service diits'an ohtsii chan gwiiniindhan. Gwiinzii akoo t'igidi'in ji' chan duuleh tseedhoh dahleii goots'an gwahtsii chan ejuk gogwahahtsaa gwik'yinjigidizhit.

Guk'atr'adaadhat Tr'iinin Digizhehk'oo Eenjit Nalii

36. Dagwidiin'e' gwalat ejuk gohtsii:

- a. Legislative Assembly k'iighe' goo committee gwik'iighe' nits'oots'at aii Child and Family Services Act gwats'an tr'ahtsii chan giiniindhan, khaii ihłogwinli' gwatak gogwinaanch'uu akoo t'igidi'ii geenjit diinjigidizhit;
- b. nits'oots'at aii Director guk'andehnahtii chan giiniindhan, jidii tthak gwidinihtat'oo goo gwinjik gwitr'it gogwahtsii chan giiniindhan.
- c. aii policy and standards nihkhan gogwahnah'yaa chan gwiiniindhan.

Jidii policy neetr'igwiheelyaa chan gwiiniindhan:

- i. Gootr'oonjii eenjit jidii gatr'agwahaadhat;
- ii. collaborative process eenjit gatr'agwahaadhat, nits'oo aii dagwiheedi'yaa eenjit ts'at nihtat natr'ivee goonlih ji' eenjit.

- iii. supervisors kat chan intervention kat chan aaha' gehdeenjaa chan t'aih goots'an tr'ahtsii chan gadhan heelyaa;
 - iv. jidii gwiyaan' an goodhaii goonlii kwaa geenjit policy and guidelines gwat'agwahdahch'yaa chan giiniindhan;
 - v. Supervision lagwiinaadhan, Voluntary Services lagwiinaadhan, K'atr'inahtii eenjit Dagwiheedi'yaa lagwiinaadhan tthak ts'at guidelines gwat'agwahdahch'yaa tr'oochit giik'atr'aanjii danh giiniindhan.
 - vi. nits'oots'at gugwandak jidii gwit'eh goo' aii aii t'at nijuk dee, nijin danh goo nits'oo gwat'agwahdahch'yaa geenjit k'atr'agwaadhat chan giiniindhan.
 - vii. nits'oo tr'oochit giik'atr'aanjii danh gwah gwitr'it t'agoh'ii ts'at aii tl'ee gootr'oonjik danh dagiheedi'yaa goo gwit'ii nagogwahtsaii danh geenjit k'atr'agwaadhat chan giiniindhan.
 - viii. tr'iinin juudin kat gootr'oonjik uu'an goontl'atr'ahchih geenjit goo dahleii geenjit nilii geenjit k'atr'agwaadhat chan giiniindhan.
37. Nijin gwa'an tr'iinin gootr'oonjik geenjit gwiizuu goo guk'at'agiiniindhan geenjit k'atr'agwaadhat geenjit gohtsii.
38. Jii tthak geenjit human resource strategy gohtsii:
- a. dahleii gwidinehtl'ee hoh'ii geenjit zhak gohtsii;
 - b. child protection workers geenjit ants'at geenjit gwitr'it gohtsii social workers chan, dinjii zhuh nilii kat chan gwitr'it goots'an ohtsii chan giiniindhan;
 - c. lay workers chan gwitr'it goots'an ohtsii;
 - d. gwadatai' tr'agwahtsaii geenjit gwitr'it gogwahtsaii;
 - e. child protection workers eenjit ts'at social workers chan ge'tr'onahtan goots'an gohtsii;
 - f. juudin atr'oodahkat gwizhit gwitr'it ahdandaii duuleh juudin gwitr'it dehk'it zhit dhidii goots'at tr'iinjii geenjit giiniindhan.
39. Inch'its'at aii juudin gwitr'it dehk'it danh gwitr'it t'agogwah'ii loo aii jidii policy and standards manual juk srinatr'igwiheelyaa gadiinjigidijii.
40. Nits'oo guk'andehnahtii geenjit gwadatai' gohtsii nijin chan ginjih gahdaaghoo nihkhan akoo t'igidi'ii, gootat daoch'uu geenjit guk'andehnohtii, ts'at juudin supervisor nilii gahgiheedandaih.

41. Guk'andehnahtii goo t'agoonch'uu geenjit t'igidi'ii aii tthak policy and standards gwik'it gweenjit gohtsii.
42. Jii Child and Family Information System (CFIS) gwijihkkeh nits'oo juk tadha'ee ejuk gohtsii jidii juk gweendoo gwat'agwahdahch'yaa geenjit nilii, leii kat gweenjit, nits'oo jidii tthak hah goo'ait srits'at gwiheelyaa, guk'andehtr'inahtii eenjit goo t'agoonch'uu, gogwandak tr'oonjii, ts'at yeendoo geenjit gisriinat'itheelyaa.

Social services t'agidi'ii

43. Social worker kat akoo child protection workers kat hah gweenjit nekhwek'yuu eenjit gagootr'oonahntan aii dagwidiin'e' gwizhit gohtsii.
44. Social work regulation process gwichiilagwidhoo'ait, aii t'ee zrit, dineht'eh tthak goots'an ohtsii.
45. Aii child protection workers kat chan giik'anohnjii ants'at, nihkhan chan ndoo ts'at geenjit, akoo ts'at jii tthak hah:
 - a. nits'oo aii dagwidiin'e' gwidinuut'oo zrit gwik'itadziigahah'yaa gwat jidii k'atr'agwaadhat gwidinuut'oo geenjit giik'agahaandal;
 - b. human rights, dagwidiin'e' ts'at jidii atr'oodahkat gwizhit goonlii gehkhee ts'at jidii gwizhit goonlii giik'agaanjii;
 - c. Dagwidiin'e' gwizhit jidii gwidinuut'oo goo dagwinuu gwik'itadziigahah'yaa geenjit gwik'it gohtsii;
 - d. goolat kat chan guk'agahnahtyaa ts'at tr'igiheendal geenjit nits'oots'at gagwataandak;
 - e. nihts'at tr'igiinjii, nihkhan naginiinlii, goo nihts'aiigwahch'it eenjit;
 - f. NWT gwizhit nits'oo gwiidandait geenjit uunjat kat ts'at giik'agahaandal;
 - g. T'angiinch'uu goo jidii iisrits'at gwiizuu goo'ait vah gwiilii geenjit;
 - h. Jii dagwidiin'e' kak, *Access to Information and Protection of Privacy Act* (ATIPP) eenjit giik'agaanjii, ts'at nits'oots'at vagwandak gwats'an ohtsii gehkhee ts'at aii jidii *Child and Family Services Act* gwizhit chan nihtats'at.
46. Case Management eenjit gwiniint'ait gohtsii, juhts'ants'at geenjit diinjigidizhit:
 - a. clients kat hah nihkhan gwah tr'igiinkhii, dagiinch'uu, ts'at nits'oots'at ndoo gugwandait geenjit;

- b. tr'iinin kat juu guk'atr'inahtii chan gwah tr'igiinkhii;
 - c. tr'oochit tadhadhat eenjit goots'at tr'igiinjii, gaogoonuu gwich'i' k'atr'inahtii, ts'at nits'oots'at goots'at tr'igiinjii geenjit.
47. Tthak ts'at jidii gwiinzrii goots'at tr'igiinjii geenjit goots'an ohtsii, dagakaiik'it danh tr'oochit.
48. Tr'iinin kat tr'oochit goovaniinji' giheedhat geenjit nits'oots'at gwitr'it gogwahtsii, aii "Tthak Guudavee Gwiheezaa Geenjit" akoo t'agidi'ii geenjit diinjigidijii.
49. Aii tr'iinin gwik'anahtii nilii gwijihkkeh zrit, duuleh HSS ihlee gweenjit gwitr'it t'agwah'ii goozrit juudin giik'aanjik nilii, aii tr'iinin digiyuughwan ts'at gwaandak jidii rights, responsibilities akoo ts'at nits'oots'at aii tr'iinin kat guk'agahnahtyaa geenjit.

Placement services

50. Aii dagwidiin'e' ejuk gohtsii jii tthak ts'at:
- a. duuleh vadaotijaadri' juu protection hearing danh oodhilch'eii tr'iinin juudin vahdandaii nilii goo vadaazhii nilii ts'at goontl'atr'ahchih geenjit gadhan heelyaa gwik'it gohtsii;
 - b. ihlee geenjit aii tr'iinin foster family goots'an ohtsii, gwat gwichih aii kaiik'it gahgiheedandaii geenjit.
 - c. gwadaazhii nilii kat guk'aginahtii geenjit gadhan giheelyaa, akoo ts'at policy geenjit gohtsii;
 - d. adai' gwanoo nits'oo tr'iinin gwantl'atr'ahchih juk gwik'it akoo t'igidi'ii geenjit t'aih goots'an ohtsii ts'at aii eenjit policy gohtsii chan;
 - e. tr'iinin gwantl'atr'ahchih ts'at tr'iinjii gadhan gohtsii;
 - f. duuleh aii atr'oodahkat gwizhit nits'oo tr'iinin gwantl'atr'ahchih geenjit gadhan gohtsii ts'at aii Director geenjit gadhan giits'an ohtsii;
 - g. aii tr'iinin protection worker zrit aii tr'iinin vizhehk'oo kat ts'at nits'oots'at tr'iinin goontl'atr'ahchih geenjit goots'at giinkhii geenjit gadhan gohtsii;
51. Duuleh tr'iinin gwantl'atr'ahchih geenjit gadhan gidilih ji' geenjit database gwik'it gohtsii gahgiheedandaih geenjit.
52. Aii foster family placement ts'at jidii recruitment eenjit program gwizhit jii tthak gwizhit nanohlaii:

- a. duuleh dinjii zhuh tr'oochit gwitr'it goots'an gahtsih ji' ganiinji'giheedhat;
 - b. vetting eenjit duuleh gwadatai' gohtsii;
 - c. nijin gwa'an aii tr'iinin goontl'atr'ahchih chan gwiinchyah gohtsii;
 - d. foster families eenjit tseedhoh leii, gwats'an tr'igiinjii, akoots'ants'at goots'an ohtsii;
 - e. duuleh dagakaiik'it gwizhit khehlok gwich'in kat goovaniinji'hohthat.
53. Nahgwan gweedhaa eenjit gwiinleii gohtsii, nijin danh geetak dinjii kat goots'at gigiinkhii geenjit gagadhan.
54. Nijin ginjih hah goots'at tr'iinjii geenjit goots'an ohtsii, guk'andehnahtii eenjit, shik dagiinch'uu chan guk'andehgahnahtyaa, kheenjit k'anahtii kwaa kat geenjit, akoots'ants'at geenjit niinji'giteedhat chan.
55. Policy gwizhit chan, aii foster family kat chan zrit tr'iinin kat ts'at tr'igiinkhii geenjit gadhan gohtsii, gwat geetak zrit, nijin chan aii tr'iinin goovat'agiiniindhan gwits'at chan goots'an gohtsii.
56. Nijin tr'iinin goochyaa goo goojuu kat hah t'angiinch'uu goovah t'angiinch'uh ji' geenjit shik tr'oochit gwik'it niinji'giheedhat.
57. Foster families kat chan tseedhoh, goots'at tr'igiinjii, giik'atr'aanjii, ts'at jidii tthak geenjit policy and procedure gwik'it gohtsii.

K'eejit kat geenjit guk'anahtii gwik'it gwitr'it gohtsii

58. Jii tthak geenjit aii dagwidiin'e' ejuk gohtsii:
- a. nits'oo aii tr'iinin tsal kat guk'aginahtii chan aii Director k'iighe' tr'iinin njoo gwik'it guk'aginahtii;
 - b. k'eejit njoo vaghail 16, 18 gwits'at nilii, duuleh duuyeh gwik'it heelyaa geenjit gadhan nilii, goo duuleh gwizhit niindhan ji' geenjit gadhan nilii gwik'it gohtsii;
 - c. duuleh zrit k'eejit njoo nilii vaghail 23 gwits'at tthak loo permanent ward aii Director guk'aginahtii nilii;
 - d. tr'iinin tsal ts'at k'eejit kat aii Director k'iighe' guk'agahnahtyaa kwaa geenjit geenjit services and support goots'an ohtsii.
59. Aii guk'aginahtii kwaa tl'ee dangiinch'uu geenjit guk'it gwinoh'ii ts'at dangiinch'uu geenjit gwik'it policy and standards gohtsii.

Nits'oo vagwideech'in geenjit:

Jidii gwiinzrui gogwiteech'yaa geenjit gohtsih ji' t'at nihkhah aii tr'iinin kat gwitr'it nizrii gohtsii, nihkhah aii khehlok gwich'in kat gwitr'it gogwahtsii ts'at goots'an ohtsii akoo ts'at t'aih goots'an ohtsii. Aii tr'iinin kat chan inihlik gwa'an goodavee gwiheezaa geenjit nihkhah gwitr'it gohtsii chan gwiiniindhan – gwitr'it gogwahtsii kak gehkhee ts'at gwizhit natr'iniinlii chants'at aii dagoonch'uu gwizhit tthak. Juhts'ants'at akoo t'agidi'ih ji' chan niinzhuk nakhwah gweedhaa guugaa loo jidii gwichii chan gwiheezaa gwik'it gwiteelyaa ts'at tthak srinatr'igwihee'yaa chan gwiheelyaa.

Duuleh kaiik'it tthak hah lagwiinaadhan gohtsii, khehlok tr'iinin digizhehk'oo haa tthak eenjit, ts'at inihlik gwa'an t'aih gwats'an ohtsii. Juk aii dagwidiin'e' gwizhit dhidlii gwat jidii geenjit loo gugwideech'in kwah gwik'it goo'aih. Geetak hee aii Department chan ganaajat gwik'it goonlii, geenjit ihlee gidi'ii kwaa, resource constraints, gwandak dinjii kat eenjit nilii kwaa gwat kaiik'it gwizhit gahgidandaih kwaa, gwat geenjit gwitr'it gogwahtsii kwaa.

Kaiik'it t'aih goots'an tr'ahtsii geenjit

60. Dagwidiin'e' ejuk gohtsii geenjit:

- a. dinjii zhuh goo kaiik'it gookhehlok nilii kat ts'at aii director t'aih goots'an ohtsii, jidii regulations gwizhit goonlii;
- b. kaiik'it gwitak gwinyaanch'uu gwizhit aii gwichit nilii chan lagwiinaadhan gwik'it gwahtsii, jidii tthak chan giiniindhan haa tthak gwizhit, akwah ji' guugaa tth'aih akoo t'agidi'ii geenjit.

61. Nits'oots'at guk'andehnahtii geenjit gwitr'it goots'an ohtsii duuleh inihlik gwa'an guk'andehnahtii loo gwik'it akoo t'agidi'ii gwik'it goo'aih.

62. Nakhwakaiik'it gwitak gwinyaanch'uu gwizhit policy akoo standards gohtsii aii hah t'aih gwats'an ahtsii geenjit gadhan heelyaa.

63. Nijuk dee kaiik'it gwatsal gwats'at t'aih goots'an tr'ahahtsaa geenjit gadhan heelyaa, aii geenjit duuleh plan goo policy gwik'it ohtsii, dinjii zhuh ants'at dinjii zhuh nilii kwaa kat gwah akoo t'agidi'ii gadiinjigidizhit.

64. Interagency ginjih gadaaghoo gatr'igiinkhii nits'oo diyeenjit gwiheezaa geenjit gohtsii.

Kaiik'it Tthak Hah Łagwiinaadhan Tr'iinin Digizhehk'oo Khehlok Nili Kat Hah

65. Dagwidiin'e' ejuk gohtsii jii geenjit:
- a. Aii Director k'iighe' tseedhoh gwats'an ahtsii gwiiniindhan, (jidii tseedhoh gooheekat community coordinator eenjit, and drin geenjit t'agwanhchii gooheekat chan) gagootr'oonahant, gehkhee ts'at Child and Family Services Committees eenjit;
 - b. mandate hah duuleh ejee natr'iheedilyaa geenjit aii Child and Family Services Committee dagidi'ii geenjit nits'oo nakhwek'yuu gwik'it gwihee'yaa geenjit;
 - c. juudin aii committee gwakak dhidii loo jidii child protection eenjit dagidi'ii igidint'eh gootat gwitr'it gogwahtsii giiniindhan ji' gadhan goots'an ohtsii.
66. Jidii łagwiinaadhan gwinjik gwitr'it t'agogwahah'yaa loo staff members k'iighe' guk'agahnahtyaa, community standards chan, gehkhee ts'at jidii vakak gijilch'ei haa tthak; dinjii kat gahgiheedandaii gwik'it gohtsii, ts'at leii goots'at tr'igiinjii eenjit gwik'it gohtsii.
67. Duuleh aii tr'iinin guk'aginahtii kwaa, gookhaiinji' gidaadhat, goo goodhahkhaii eenjit aii kaiik'it chan gwik'itadziigahah'yaa eenjit gwik'it gohtsii.

JIDII DAGWIINIINDHAN JII TTHAK TS'AT IZHII KHEHŁOK NILII TTHAK GEENJIT

Nits'oo vagwideech'in geenjit:

Zhehk'oo haa tthak nits'oo t'angiinch'uu aii Committee tthak niinji'gadhat jidii tthak k'iighe' geenjit t'angiinch'uu gahgidandaii. Nakhwah gwich'in kat k'iighe' jidii khehlok nilii kat chan guk'iighe' jii tthak gogwinah'in ji' chan gwiheezaa t'agoonch'uh.

68. Department of Justice iinch'ii zrit aii Legal Aid hah gwiinchii gwik'it gogwahtsii, tr'iinin kat goots'at tr'igiinjii geenjit, digizhehk'oo hah tthak chan.
69. NWT Housing Corporation chan:
- a. aii zhehk'oo tthak nihkhah t'agiheech'yaa gwik'it guk'aginahtii chan gwiiniindhan aii geh'an nits'oots'at guk'atr'inahtii chan gwiizrii akoo t'agidi'ii geenjit diinjigwidijii;
 - b. jidii zheh gidi'ii tthak loo gwizhit tr'igwich'in t'angiinch'uu geenjit guk'aginahtii;

- c. Child and Family Services kat hah nits'oots'at gwah gwitr'it t'agogwah'ii chan gi'gwadhan gwiheelyaa geenjit niinji'giteedhat chan gwiiniindhan.
70. Aii Department of Education, Culture and Employment kat chan income support ts'at gwats'at tr'igiinjii geenjit policy gidi'in guk'andehnohtii, jii geenjit:
- a. jidii zhehk'oo gwats'an ohtsii t'at t'agwanhchii nilii khanagaandaii geenjit;
 - b. iinch'its'at aii tthak goots'an ohtsii, jidii gwidinithat'oo gwizhit;
 - c. nijuk dee tseedhoh gogwahtsii iinchits'at gahgiheedandaii geenjit.
71. Health Social Services kat hah tthak chan jidii addictions treatment gwiinchii gogwahtsii chan gwiiniindhan nakhwakaiik'it gwitak gwinyaanch'uu gwizhit gwiheelyaa ts'at nits'oots'at gwats'at tr'iinjii geenjit nilii.
72. Government NWT eenjit t'at jidii datsan gwich'i' eenjit nilii ginjih ahtsii chan gwiiniindhan, nijin chan gwik'it gogwahtsii ts'at tr'iinin k'atr'inahtii geenjit nilii.
73. Health and Social Services kat chan duuleh strategic plan jii gwandak gooheendal geenjit gogwahnah'yaa ts'at drin ihlok gwijuutin juutin ts'at neekok gwijuutin tl'ee gwidii gatrigiteekhyah chan gwiiniindhan.